

楹

聯

叢

話

楹聯叢話卷之八

福州梁章鉅輯

格言

章鉅少承庭訓先資政公每作書必爲章鉅講明其義嘗
自署書室曰四勿齋謂無益之念勿起無益之事勿爲無
益之言勿說無益之物勿食也每爲人書楹帖必用格言
謂章鉅曰人來乞書而不以格言應之卽所謂無益之事
也一日與先伯父奉直公爲人分書楹帖先伯父書一聯
云欲知世味須嘗膽不識人情只看花公亦書一聯云非

楹聯叢話

卷八

關因果方爲善不計科名始讀書呼章鉅語之曰汝知此
兩聯意義之深厚乎汝伯父所書乃涉世良方我所書乃
自修要旨也終身用之不盡矣

通行楹帖有云謙卦六爻皆吉恕字終身可行先資政公
最喜述之謂章鉅曰此是經訓非僅楹聯而已又集四書
語示章鉅曰敏則有功公則說淡而不厭簡而文此兩語
學古服官淑身涉世皆宜亦可當座右銘也

余耆齡卽受業於孟瓶菴師

超然

之門師由吏部郎乞養

歸里時年方四十掌鰲峰講席十餘年終老於家宅後有

亦園亭爲讀書靜坐之地日以懲忿窒欲自課製楹聯云
談性命則先賢之說已多何似求之踐履學考訂則就衰
之年無及不如返諸身心

七修類稿云宏治間吏部尙書三原王公恕署門曰仕於

朝者以饋遺及門爲恥仕於外者以苞苴入都爲羞嘉靖

間藩司參議揚州錢公嶧亦自撰一聯使所屬衙門皆帖

焉句云寬一分民受一分見祐鬼神要一文不值一文難

欺吏卒王之家宰近世難及而錢忤當道不久去余謂二

對近人不知前乃真西山奏疏後亦古語也惜忘之

楊文貞

士奇

有子爲橫於鄉有密友自楚中來者每述其

惡款文貞常戒之一日書一聯示之曰不畏官司千狀紙
只怕鄉民三寸刀毫不知改後卒以事伏法人謂文貞此
聯可爲巨族藥石

呂新吾先生有銓署楹帖云直者無庸我力枉者我無庸
力何敢貪天之功恩則以奸爲賢怨則以賢爲奸豈能逃
鬼之責又公署楹帖云青天下鑒此心敢不光明正直赤
子來游吾腹願言豈弟慈祥附見呻吟語治道門

茶餘客話云中鳧盟

涵光

自見蘇門先生後大書於門曰

真理學從五倫做起大文章自六經分來又題書室聯云
學古之志未衰每日必擁書早起千世之心已絕無夕不
飲酒高歌觀此則飲酒高歌正非易易矣

桂林府之秀峰書院爲嶺西人文萃集之區乾隆間武緣

劉靈溪太史

定道

聯云於三綱五常內力盡一分就算一

分真事業向六經四子中尙論千古纔識千古大文章呂
月滄山長稱之余謂此卽從申鳧盟真理學從五倫做起
大文章自六經分來二語衍而暢之耳

吾聞之鰲峰書院有林青圃先生題聯云反己有真修須

留神檢到心身界上加工無別法務著力打開義利關頭
雅似先儒語錄

王少湖

敬臣

云有一先輩揭千宇文爲齋室楹聯而各加

注焉罔談彼短之下注云我亦有短靡恃己長之下注云
人各有長此語吾人皆當服膺也

湯文正公答沈荏岸書云李文節嘗言翰林官能壞人衙
門冷則易苟體面好則易傲無政事則易懶無風波則易
放署中堂聯云人重官非官重人德勝才毋才勝德真座
右銘也

魏敏果公

象振

由左僉都御史游升戶部侍郎一歲五遷

愈用警惕自題一聯云欺人如欺天毋自欺也負民卽負國何忍負之載年譜中

柳南隨筆云無錫杜紫綸太史

詔

由詞館假歸二十年林

居游名山殆徧乾隆丙辰游西湖歸作一絕句授其子曰此卽我遺令也未半月以微疾終詩云半生空自逐浮華放浪湖山亦大差分付兒曹無別語讀書爲善做人家卒之前三日爲其七十誕辰張宴廳事大書一聯榜於柱出句爲教子課孫完我分對句卽用所作詩結語云

隨園詩話補遺載或題書齋聯云無求便是安心法不飽
真爲却病方又過潤州時見僧壁聯云要除煩惱須成佛
各有來因莫羨人又過九華寺見一聯云非名山不留仙
住是真佛只說家常亦彼法中之格言也

武進趙恭毅公

中喬

論學以不欺爲本官浙藩時自署堂

聯云君不可負只是心難負負心者不容於堯舜天不可
欺誰言人易欺欺人者如見其肺肝又湖南院署聯云但
願民安若堵何妨署冷如冰

姚雪門

頤

督學湖南時自題使院云虧他人便虧自己須

記朝齋暮鹽我亦寒士要公道還要虛心試看晚蘭畝
楚故有材又聯云才要真愛名要畧愛總之己要白愛天
不可欺君不敢欺實於心不忍欺吳樓堂省蘭亦督學湖
南有聯云畏簡書並畏人言常以無欺盟夙夜正文風先
正士習惟將有恥勗膠庠吾聞沈心齋湖學使一聯云爾
無文字當安命我有兒孫要讀書簡而有味翁覃溪師督
學山左時亦錄此十四字懸於堂楹並爲之跋云

江南各州縣廳事多同一楹聯據王朗川言行彙纂乃王
玉池令金鄉時所作句云眼前百姓卽兒孫莫言百姓可

欺當留下兒孫地步堂上一官稱父母漫說一官易做還
盡些父母恩情語質意真妙在人人共曉若堅瓠集所載
胡可泉知蘇州揭一聯于門外云相面者算命者打抽豐
者各請免見撐廳者鋪堂者撞太歲者俱聽訪拿則未免
村氣太甚矣

余初歷外任卽守荊州嘗於廳事漫題一聯云政惟求於
民便事皆可與人言石曉田郡丞照逢人述之未及一年
擢淮海監司實筦河防非所習也因題廳事云到此真成
以政學相逢但願山中行萬廉山郡丞承紀亦亟稱之

金德山中丞在粵西藩任時作官廳對聯云坐此似同舟
宦情彼此關休戚須臾參大府公事何妨共酌商用意深
厚有名臣風味余至粵西訪其聯已不可得矣中丞復誦
其鄉人徐公士林作臬司題庭柱云看階前草綠青青無
非生意聽牆外鴉啼鵲噪恐有冤魂亦仁人之言若宋牧
仲題豫章署齋云雲白峰青煥發廬山真面目蛟騰鳳起
托揚滕閣舊風流詞雖美而意近夸矣

李恭毅公

湖

任通永觀察時題廳事一聯云人苦不自知

願諸君勤政吾短弊去其太甚與爾輩率由舊章

聞廣州郡守署中一聯云不要錢原非異事太要好亦是私心此所謂深人無淺語也惜忘却何人所撰

陳最峰

景登

牧晉州自題廳事云頭上有青天作事須循

天理眼前皆瘠地存心不刮地皮蔣南莊守潁州自題廳事云人原是俗非關吏仕豈能優且讀書陳子瀾尹來賓亦自題廳事云事出於公諸君何妨至室吏原非俗我輩還要讀書皆真樸有味

余小霞題佐雜官廳聯云此間只可談風月相對何須問主賓渾成典切於佐雜官廳尤有味

甘肅藩署官廳有薩湘林集經語聯云有孚在道明功也
同寅協恭和衷哉

桂林撫署二堂有同年趙文恪公

慎吟

聯云爲政不在多

言須息息從省身克己而出當官務持大體思事事皆民
生國計所關文恪山桂林擢督吾聞兩地皆有遺愛至今
頌聲不衰讀其楹聯堪信其言行相顧也

桂林撫署小廳中有百文敏公聯板云行所當行不爲已
甚慎之又慎未敢卽安跋云此庚申歲集古人語以自勗
者余自京尹出膺外吏所至不一載必有遷除以故湘南

浙右黔嶺滇池次第轉徙履任之暇卽手書榜諸楹間以爲座右之銘去冬於五華薇署甫刻此聯翼日而拜粵西之命涉厯愈深策惕愈甚請事斯語殆將終身以之爲封圻報稱也可以之爲密勿陳謨也可嘉慶甲子重書於桂林節署之懷清堂

程梓庭

福洛

撫吳時於官齋中自書一聯云醴泉無源芝

草無根人貴自立流水不腐戶樞不蠹民生在勤又一聯云無多事無廢事庶幾無事不徇情不矯情乃能得情

桂林呂月館

瑣

郡丞隨其父在戍所十五年始赦歸成進

士後觀政浙中初知慶元縣有大堂一聯云我也曾爲冤枉痛入心來敢糊塗忘了當日汝不必逞機謀爭個勝去君終久害著自家任奉化縣有二堂聯云民心卽在吾心信不易乎敬爾公先慎爾獨國事常如家事力所能勉持其平還酌其通梁山舟先生贈聯云蒼生自是關吾分儒者真宜做此官

聞前明王文成公行部所至必令二人肩二高腳牌前導大書云求通民情願聞己過議者以爲客氣不虛也吾友林少穆爲江蘇廉訪時嘗書此作大門楹聯是矣

余小霞乙庚筆記云州縣每遇命盜案出必有嬴役陰賅所獲之犯使供某某爲同盜則皆素封且愚懦可魚肉者被供者率以賄免而役之橐充焉謂之開花四川某尉署中有自撰楹帖云若使子孫能結果除非盜賊不開花可謂惠出一尉矣

語鄉林青圃先生歷官中外亮節高風一宅數畝外囊橐無餘余黃巷之舊松卽先生故宅也嘗自榜楹柱云庭餘嘉蔭室有藏書天下事隨處而安卽此是雕梁畫棟卜得芳鄰居成美境

黃巷又名新美境

田舍翁問心已足漫言應列鼎

鳴鐘

粵東黃翼堂

紹統

訓導石城學者稱仰山先生嘗自署楹

帖云爲倫類中所當行之事作天地間不可少之人

嘗見汪退谷先生書楹帖云汲水澆花亦思於物有濟掃
窗設几要在予心以安又梁山舟先生書楹帖云能受苦
方爲志士肯吃虧不是癡人

蔣心餘先生宅中大門聯云一代翰林風月手六朝蘭鐙
謝王家聞是彭文勤公所贈句其廳堂各聯悉出先生所
撰皆格言也大廳聯云至樂莫過讀書至要莫如教子寡

智乃能習靜寡營乃可養生內堂聯云欣戚相同爲人莫想歡娛歡娛卽是煩惱福命不大處世休辭勞苦勞苦乃得安康饗堂聯云富貴無常爾小子勿忘貧賤聖賢可學我清門但讀詩書又聯云垂訓一無欺能安分者卽是敬宗尊祖守身三自反會喫虧者便爲孝子賢孫

紀文達師曰門人耿守愚喜與人爭禮數常言士不貧賤驕人則崖所不立恐益爲人所賤余曰此田子方之言朱子已駁之卽就其說而論亦謂道德本重不以貧賤而自屈非毫無道德但貧賤卽可驕人也先師陳白崖先生嘗

手題一聯於書室曰事能知足心常慊人到無求品自高
斯真探本之論兩言可以千古矣

吳門故家廳堂有一聯云必孝友乃可傳家兄弟式好無
他卽外侮何由而入惟詩書常能裕後子孫見聞止此雖
中材不致爲非不知何人所撰訓詞深厚當家家揭於堂
楹余小霞自述其舊居廳事聯云兄弟睦家之肥子孫賢
族乃大義亦濶大

廣州香山書院聯云諸君到此何爲豈徒學問文章擅一
藝微長便算讀書種子在我所求亦恕不過子臣弟友盡

五倫本分共成名教中人

姚鐵松中丞守武昌時撰廳事聯云筆下留有餘地步胸中養無限天機蓋因舊句而改首二字也

石天基傳家寶中有一聯云言易招尤對朋友少說幾句書能益智勸兒孫多讀幾行真傳家寶也

相傳桂林陳文恭公自題其里第一聯云惜食惜衣非爲惜財緣惜福求名求利但須求己莫求人或云是武進劉文定公綸所撰然余嘗見梁山舟學士手書此對又云是

文衡山語也

汪龍莊云余治刑名二十餘年行將從宦甥蘭啓將事讀律請業於余因就疇昔所究心者書以代口題曰佐治藥言並撤寓齋中舊聯授之曰苦心未必天終負辣手須防人不堪可謂仁恕矣

彭文勤公少與蔣心餘同學有題書房舊聯云何物動人二月杏花八月桂有誰催我三更燈火五更雞今此聯熟於人口而不知其爲文勤所製也

丁白菴

善慶

督學粵西誨人必先器識而後文藝自撰一

楹帖鏤板頒之庠序句云人生窮達豈能知趁早須立此

可爲聖賢可對帝天之志客告是非且莫管得閒要讀我
有益身心有關世道之書亦可爲士林鍼砭矣

嘗見那文毅師手書贈顧菴亭工部聯云鷹隼入雲睽所
向騁驅得路慎於平工部蓋以才自見者故勗之如此宦
途中客皆當服膺也

于文襄公

敏中

嘗治蔬圃自題圃門聯云今日正宜知此

味當年曾自咬其根鄂文端公

鄂爾泰

亦有菜圃長聯云

此味易知但須綠野親身種對他有愧只愁蒼生面色多
用意各別皆格言也

近人集蘭亭序字作楹帖有極自然成格言者如與世不
言人所短臨文期集古之長 人有不爲斯有品已無所
得可無言 盡曰言文常不俗與人同事者無能 一人
知己亦已足畢生自修無盡期 相知當不在形跡修己
豈可殊初終 清言每不及世事靜坐可以修長生 知
足是人生一樂無爲得天地自然 每臨大事有靜氣不
信今時無古賢 與賢者游信足樂集古人文亦大觀
信古不遷也是昔賢知己流陰若寄無爲今世閒人 又
有集聖教序字者如大本領人當時不見有奇異處敏學

問者終身無所爲滿足時 又有集爭坐位帖字者如修身豈爲名傳世作事惟思利及人 大懼與眾人同數須知保晚節尤難 名美尙欣聞過友業高不廢等身書業高乎眾意豈滿澤及於人功不虛

閔鶴初曰嘗見一楹聯云世間惟有讀書好天下無如喫飯難語亦沈著惜未知作者爲誰又桑穀甫先生授徒輒勸人加餐食案側懸一聯云放開肚皮喫飯抖起神氣讀書想見豪情然不若徐連峰俗雲立定腳根撐起脊展開眼界放平心爲個儻有致也記余嘗薄遊永嘉謁陳觀樓

先生呂齊於署齋見自書一聯云豎起脊梁立行放開眼
孔觀書似更老氣無敵

程月川中丞

舍章

每莅一任必以自書大字墨搦一聯懸

挂廳事蓋讀書志在聖賢爲官心存君國十二字欵云敬

書朱紫陽夫子家訓語按此是我朝岷山朱柏廬先生

用純

所撰居家格言自黎明卽起至庶乎近焉凡五百一

十字此其末段結語通篇語皆切實而此二句尤爲賅括
允堪懸作座右銘今人誤以此篇爲朱子所作中丞亦未
加深考耳中丞又嘗書好鳥枝頭亦朋友落花水面皆文

楹聯叢話

卷八

三

章兩語爲書室楹聯旁亦注云書朱紫陽夫子句不知此乃南宋翁森所作四時讀書樂詩並非朱子中丞亦沿訛而不知也

楹聯叢話卷之九

福州梁章鉅輯

佳話

柳南隨筆云嚴恪字心萱文靖公之父也文靖公已晉尚書而封翁猶康健自書堂中一聯云有子萬事足我子作尚書足而又足七十古來稀我年近大耋稀而又稀

松窗筆乘云尤悔菴侗著臨去秋波那一轉制義流傳

禁中

世祖知其爲徐立齋業師因取觀之歎爲真才子及官翰

林嘗偕諸儒臣進平蜀詩文

聖祖見其名曰此老名士悔菴以此二語刻堂柱左曰

章皇天語右曰

今上玉音極文人之榮

王文成公之父海曰先生

華

官至南京吏部尙書致政時

值文成公平宸濠先生自題書室一聯云看兒曹整頓

一作

轉乾坤任老子婆娑風月如此福分如此襟期自當隻干

古而無對我 朝桐城張文端公及見子文和公晉揆席

自題門聯云綠水青山任

一作

老夫消磨

一作

歲月紫袍

金帶

一作紫宸黃閣

看吾兒變理陰陽正襲海曰語按海曰語又

似從謝太傅對客語中化來特不如其蘊藉而張語則風

味又減矣

無錫嵇文敏公

會筠

及文恭公父子相繼為宰相門聯云

王聖臣賢兩朝宏碩輔父先子後一氣轉洪鈞桐城張文

端文和亦父子宰相門聯云二世三公太平宰相一堂五

代富貴神仙按我

朝韋平濟美者滿洲人為多惟尹文

恪公

尹泰

尹文端公

尹繼善

慶文恪公

慶桂

三世蟬聯為

最盛漢人則山左劉文正公

統勳

文清公

壩

及嵇氏張氏

皆以父子相繼此外無聞焉記宋尤玘萬柳溪邊舊話載
其家自文獻輝文簡袤科名接武嘗築圃西湖度宗幸其
堂御筆題楹間一聯云五世三登宰輔弈朝累掌絲綸朝
紳榮之知盛事亦自古所僅見矣

殷彥來

譽慶

贈王漁洋一聯云天下文章莫大乎是一時

賢士皆從其游其時亦惟漁洋足以當之聞錢名世初游
京師除夕以聯送漁洋云尙書天北斗司寇魯東家由是
知名後送權貴句云分陝旌旗周太保從天鐘鼓漢將軍
因之謫官

科第世家以江南爲盛我朝溧陽史氏崑山徐氏兩家
祠堂長聯孰在人口不但今世所稀蓋自古亦少遇矣按
史氏聯云祖孫父子兄弟叔姪四世翰苑蟬聯猶有舅甥
翁壻子午卯酉辰戌丑未八榜科名鼎盛又逢己亥寅申
亥溧陽史氏自康熙未史鶴齡始入翰林至壬戌其子
史夔繼之庚辰其孫史貽直繼之乾隆乙丑其姪孫史貽
謨繼之已酉其曾孫史弈簪繼之此外則其壻金壇于小
謝其甥于敏中丹徒任蘭枝陽湖管幹珍並前後爲翰林
世謂海內無第二家也若次聯所云則史鶴齡爲丁酉舉

人丁未進士史夔爲辛酉舉人壬戌進士史夔之弟史普
爲己卯舉人庚辰進士史隨爲戊子舉人己丑進士史貽
直爲己卯舉人庚辰進士史貽謨爲甲子舉人乙丑進士
其弟史貽簡爲癸卯舉人甲辰進士又史鶴齡之曾孫史
奔簪爲己酉舉人戊辰進士史光啓爲壬申舉人史應曜
爲丙午舉人八榜科名彬彬可考而合史光啓之王申計
之實爲九榜惟己亥寅三榜尙闕有間則未語又逢己亥
寅申云云亦尙須細考耳

崑山徐氏祠堂聯云教子有遺經詩書易春秋禮記傳家

無別業解會狀榜眼探花按徐健菴尙書

乾學

係順治甲

午拔貢庚子舉人康熙庚戌探花徐果亭閣學

秉義

係康

熙己酉舉人癸丑會魁探花徐立齋相國

元文

係順治甲

午經魁己亥狀元並無解元會元榜眼聯語亦不過渾括

言之然三兄弟並登鼎甲並列崇班不可謂非難能可貴

耳至上聯所云語乃質實可風健菴尙書著有讀禮通考

果亭閣學著有經學識餘立齋相國著有含經堂集而傳

是樓藏書之富甲於寰區教子遺經豈虛語哉

徐健菴先生以大司寇謝病歸

樞聯叢話卷九

四

御書光燄萬丈扇以寵其行時人贈聯云萬方玉帛朝東海一點丹誠向北辰

紀文達師曰先師介野園先生嘗四主會試四主鄉試其他雜試殆不可縷數嘗有恩榮宴詩云鸚鵡新班宴

御園摧頽老鶴也乘軒龍津橋上黃金榜四見門生作狀元于文襄公贈以聯云天下文章同軌轍門墻桃李半公卿可謂儒者之至榮矣

深陽史文靖公

貽直

七十壽辰獻聯者充門惟許刺史

佩

璜云三朝元老裴中令百歲詩篇衛武公及袁簡齋先生

云南富六一先生座北面三千弟子行爲公所許可

乾隆末漳浦蔡文恭公 予告歸里小住福州所主者爲
余戚黨家時余方齟齬嘗從人於屏後竊覘之記得先資
政公言有一客贈聯甚莊重切實句云主恩前後三旋里
天語丁寧再入朝似是中朝達官所製彼時但能述其語
而已不能舉其名矣

乾隆六十年中各直省奏報壽民壽婦五世同堂親見七
代八代者屢見邸抄然未有如長洲蔣氏之盛者乾隆丙
申春內閣中書應焜之祖文源年九十配張氏年八十九

翰林院編修元益之祖文涵年八十九配顏氏年八十八
俱五世同堂親見八代應焄元益同日給假回籍祝壽海
內榮之時徐兩峰巡撫士林製聯稱祝云登甲登科七代
兒孫繞膝難兄難弟九旬夫婦齊眉盛事也

嘗見劉文清公爲紀文達師書聯云兩登耆宴今猶健五
掌烏臺古所無蓋吾師自撰句也梁山舟學士贈聯云萬
卷編成羣玉府一生修到大羅天

英煦齋師恩福堂筆記云先文莊公掌容臺者十二年與
達香圃紀曉嵐劉青垣三宗伯同事余於嘉慶庚申追隨

三先生亦列春官迨癸酉重任時乃鐵冶亭王春圃兩先生爲大宗伯秀楚翹胡西庚汪瑟菴爲少宗伯鐵出王門胡汪秀三公及余前後皆出鐵門其時有春官六座六師生之諺因製聯留署句云典禮奉寅清粉署重來愧說箕裘延世業同堂聚師弟薪傳遞衍始知桃李屬春官按是年適爲王春圃先生八十壽辰合署稱觴屬章鉅爲儷體序文中有官分兩座座中以座主爲尊賓列四門門下之門生疊至旬時春圃哲嗣蓮甫先生亦繼爲少宗伯每對同官亟誦之

恩福堂筆記又云曹文敏公

文埴

以右庶子視學江西適

曹文恪公家居獻一聯曰韓愈官爲右庶子莊周篇有大

宗師彭文勤公視學浙江時杭州守爲邵公

齊熊

公贈聯

曰杭州太守湖山美康節先生安樂窩皆可云典切前輩
於應酬文字不苟如此

梁文莊公

詩正

旣相後稽文恭公贈聯云秋圃黃花韓相

國春風紅杏宋尙書臺閣頌揚語又何其妍麗也

山左劉文清公在相位其太夫人九十壽辰

仁廟賜壽備極恩榮阮芸臺先生撰聯寄祝云

帝祝期頤卿士祝期頤合三朝之門下亦共祝期頤海內
九旬真壽母夫爲宰相哲嗣爲宰相總百官之文孫又將
爲宰相江南八座太夫人蓋其時文清以兩江總督遙執
相權而信芳先生已官太宰也此與岷山徐氏溧陽史氏
家祠中聯皆無第二家足以當之

直隸真定府試院後樓五楹合祀關帝文昌乾隆中吳白

華先生

省欽

視學適

召回京代者卽令弟稷堂先生在真定交替時白華先生
撰一聯云文武一龕如在上弟兄同節此登高蓋恰值重

九日可云巧合

慶蕉園宮保

慶保

爲廣東將軍時王省厓尙書

鼎

贈聯云

恩衍韋平祖父子孫三宰相家傳忠孝弟兄叔伯四將軍
巨製鴻題足以稱其家乘

揚州喬椿齡字榜友善易數雖至友不輕爲卜詩文之格
唐以下不屑仿也其弟子阮芸臺先生已貴未嘗通一札
及先生視學山左禮請衡文乃往卒於青州嘗榜其齋云
四方名士皆知亡八座門生正少年

英煦齋師六十壽辰適近七夕有呈壽聯者最著稱人口

而忘却何人所作句云四海仰雙星六秩衍大撓甲子二
難躋八座九天錫媯氏笙簧時公子奎耀奎照皆躋貳卿
內府錫樂部爲壽云

阮芸臺先生五十歲時在漕帥任衍聖公孔治山先生贈
以壽聯云鼎甲連科皆屬公門桃李下淮揚列郡更開軍
府梓桑間蓋先生揚州人正漕帥轄下也

阮芸臺先生於道光十八年以大學士引年 予告返居
廣陵里第瀕行奉

恩諭有怡志林泉之語舉朝羨之潘芝軒相國贈聯云四

楹聯叢話卷九

海具瞻尊爲山斗同朝欽羨望若神仙

吳興沈均堂

世棟

由湖北方伯告歸其子希人學士官內

閣亦請假歸省有同人以聯贈行云鶴鳴在陰其子和鴻
飛遵渚我公歸

朱建三生於七月七日所居之里名百花巷李笠翁壽以
聯云七夕是生辰喜功名事業從心處處帶來天上巧百
花爲壽域羨玉樹芝蘭繞膝人人占却眼前春

笠翁五十歲生男自題楹聯志喜云一生好事無雙日百
歲閒身得半時

康熙間有某相國家擅園林之勝相國亦雅有文望李笠翁贈之聯云朝罷獨行春踏去不知三徑遠公餘時讀史坐來便覺五雲多

李笠翁贈李坦菴相國聯云名世天生五百年爲福黎民特使早居黃閣上元老人稱二十載宜增華髮誰知正在黑頭時蓋相國年未及三旬卽登揆席也

李笠翁有壽方太夫人七十聯自爲之序云夫人爲何芝嶽相國之女方坦菴官詹之配樓岡學士邵村侍御與三孰四世五孝廉暨謙六任子之母茹齋奉佛兼禮列仙句

云出宰相之門入官詹之室居學士侍御孝廉胄子之堂
足不履民家戶閩者七十年於此繼麻姑之跡追王母之
蹤證如來觀音文殊普賢之果口偏食人間烟火者八千
歲猶然

又壽陳太夫人八十聯自爲之序云此蕉鹿先生之母也
時畫錦歸來專爲稱觴一事太夫人七十時令子猶爲外
吏今則內擢司農矣句云踰古稀又十年喜當時令子高
遷幾度錦衣歸閤閤去期頤尙廿載看後茲文孫繼起滿
堂牙笏頌岡陵

梁文莊公乞假養親

賜萊衣書永四字扁額又

賜詩云棚祝還朝晚卿家慶更深

天語肫華如此可謂備極恩榮稽文恭公贈聯云花宴瓊
林溫仲舒由大魁秉政堂開畫錦王文獻以宰相養親亦
莊麗得體

無錫鄒小山宗伯一桂有門生某弟兄皆詞林二子並登

甲科而其母則以側室受封者也七十誕辰求公撰壽言
公令諸門生擬之俱不稱意蓋不難於頌揚而難於得尊

者之口氣也公乃自撰聯句云有子有孫都成名進士多
福多壽是謂太夫人於是執筆者咸歎服又張船山太守
問陶爲吳穀人先生錫麒之太夫人撰壽聯云惟善人現
壽者相有令子爲天下師亦質樸有味時先生方爲國子
祭酒也

隨園詩話補遺云乾隆庚寅余在杭州訪蔣茗生太史聞
寓湖州太守張公處卽具名紙往投蔣未見乃先有一我
冠者拱出心知是太守素無交而其意甚親未免愕然太
守笑曰先生不識我耶我早識先生並識先生之夫人貌

作何狀令姊親作何狀厯厯如繪余益驚問故太守曰當年公作翰林住前門外橫街我年九歲與公陸氏二甥同在蒙館讀書每放學後嬉游公家公姊及夫人梳頭常在旁手進梳篋公過猶呼餅餌啖我公竟忘耶余謝曰事實未忘不料昔日聖童今爲公祖也惜二甥早亡矣相與唏歔者久之從此遂別更二十年太守之子惠堂孝廉來權知溧水又是余改官江南第一次捧檄之所重重春夢思之憮然其前事迹已作古詩一首贈蔣梓入集中矣今年衰不能再贅乃作一聯留惠堂廳事云後我卅年同爲此

地親民宰通家兩代曾見而翁上學時蓋實敘平生佳話
非敢挾長也

梁山舟學士於嘉慶十六年冬患髮疽危篤中見有人持
楹帖入其句云萬里烟雲開瘴戶一天風雨護神鑪病遂
愈因自號新吾長翁後九十誕辰夫婦齊齋清健張岐山
問萊贈壽聯云人延百年猶赤子天留二老看元孫時人
稱其工切

梁山舟學士最工爲壽聯得之者無不樂其雅切如壽吳
太夫人八十云八座起居令子官袍慈母綫重閨燕喜南

陽仙菊北堂登自注令子方開蕪河南故用南陽菊事又
壽嵇文恭公八十云螭幻舊齒符天壽鴈塔新題冠佛名
時公以萬壽年生日重宴瓊林也又壽王述菴侍郎刑八
十云盾鼻弓衣行世文章皆事業屏風團扇還山官府卽
神仙又壽許小范六十云甲子從頭開上壽神仙自古有
曾孫時許已有曾孫也又壽趙次乾云東方先生善諧謔
南極老人應壽昌又壽汪西澨沈云國門舊轡千金重鄉
社新圖九老尊又壽博羅蘇明府云會翻李委南飛曲會
領朱明大洞天又壽博羅成明府云鼓琴自擅寰中手飛

鳥來看海上山又壽姚宗伯是年與千叟宴者云履舄殿
庭千叟上台光角亢兩星間又壽陝西何中丞未及年而
與千叟宴者云家傳玉節仍分陝天賜瓊筵預杖期又壽
袁簡齋先生云藏山事業三千牘住世神明五百年又壽
直隸梁制軍云旌麾畿甸尊宗袞杖履耆英壽國楨又壽
閩中丞奉使本籍讞獄者云玉節承天南斗靜錦衣行晝
使星明又壽尹文端之子爲福州將軍者云龍門世澤華
附盛鯨海威名草木知

廣東馮潛齋

成修

幼牧牛夢有持扇爲障日者扇上有貴

州學政四字因奮志讀書年三十四始遊庠逾年登賢書
聯捷成進士由庶常改部曹典蜀試又典問試嗣督學貴
州旋罷歸好論文有馮八股之目年九十餘始卒乾隆壬
寅八表與夫人同庚康健無恙屆結褵周甲之期親友門
生駢集稱慶重行花燭交拜之禮自署門聯云子未必肖
孫未必賢屢忝科各只爲老年娛晚景夫豈能剛妻豈能
順重諧花燭幸邀天眷錫遐齡至乾隆壬子重赴鹿鳴洵
美談也

趙甌北先生早賦歸田不與外事惟以著作自娛劉石菴

先生手書贈聯云務觀萬篇半皆歸里作啓期三樂全是達生言趙得之甚喜

顏魯興

伯盡

巡撫滇南署堂聯云彩雲見處先後六十年

中三世建牙宜何如効涓埃以肯堂構湛露承來縱橫八千里外百蠻稽首所願與與禮讓而廣農桑王霞九觀察贈芳云出語公自紀實殆黔國公後所僅見者

廬陵劉古菴上舍

宗輝

買舟滕王閣爲舟子書聯云有客

臨舟懷帝子何人下榻學陳公時商邱陳望之爲江西巡撫見之笑曰奇士也命延之入且曰爲君下榻矣一聯之

遇合亦奇

陶雲汀宮保開府大江南北者十有餘年各位兼隆吏民
翁服潘功市舍人有祝五句壽聯云能文翰林能言御史
能任封疆贊翊聖化有真經濟才公論出朝士口爲國籌
運爲民興利爲我鄉里表彰賢達得大光明壽妙法現宰
官身又齊梅麓太守祝六句聯云八州都督五柳先生經
濟文章千古心傳家學遠六甲初周一陽來復富貴壽攷
百年身受國恩長蓋宮保誕辰在黃鐘之月也又程春海
侍郎寄贈一聯云海涵地負之才文章博辨議論雄偉

溫秋肅之政動用縣解靜專直方合諸名流之語觀之其
人之生平可定矣

歙縣曹文正公由戶部侍郎晉工部尙書時其門下士徐

訪巖廉訪

寶森

贈聯云再世宮衛太保少保兩朝

褒眷司徒司空

楹聯叢話卷之十

福州梁章鉅輯

挽詞

秋雨菴隨筆云輓聯不知起於何時古則但有輓詞卽或有膾炙人口二句者亦其項脰聯耳惟石林燕語載韓康公得解過省殿試皆第三人後爲相四遷皆在熙甯中蘇子容輓之云三登慶厯三人第四入熙甯四輔中此則是輓聯之體耳

恩福堂筆記云紀文達師輓朱笥河先生一聯云學術各

門庭與子平生無唱和交情同骨肉俾予後死獨傷悲二公所學具見於此而語尤真摯且非筭河先生不能當斯語非文達師亦不敢作斯語也

恩福堂筆記又云乾隆戊戌余隨侍先文莊公赴閩撫任道出杭州值先文莊公六十壽辰中丞學使分日爲賀此余得瞻彭文勤公之始也迨余入詞垣適公爲大教習最余曰向讀之經書不可拋荒已讀之詩文仍未足用應將文選及唐宋詩醇文醇盡卷熟讀可爲好翰林矣余因是加勵迨嘉慶壬戌遂與公同學院事一日公告余曰內子

昨問新院長爲誰答曰乃我在杭州汝亦見過甫八歲之
堯世兄也二老同深嗟歎故癸亥公捐館時余哭之痛獻
聯云榕嶠奉行輿道出臨安絳帳摠衣纔八歲蓬山陪末
座職猶弟子玉堂撰杖忽千秋蓋紀實也

紀文達師輓劉文正公

統勳

聯云岱色蒼茫衆山小天容

慘淡大星沈句奇語重非文正公不足以當之

成親王輓福文襄郡王

福康安

聯云大名諸葛身先死異

姓汾陽

帝不疑我

朝以異姓封王者如定南王孔有德義王孫

可望靖南王耿繼茂襲義王孫徵淳平南親王尙可喜海澄公贈王傅黃芳度皆在 國初年間雍正乾隆以來惟福文襄一人而已

福郡王薨於湖南軍營時苗疆所在建祠紀文達師撰聯云汾陽王名位相同功業常新萬里有將軍壁壘忠武侯經綸未盡英靈如在百蠻拜丞相祠堂

彭春農曰先文勤公出董文恪公邦達之門嘉慶丁巳文

恭公諱丁太夫人憂

高廟遣官奠酒加賞陀羅經被文勤公輓聯云心愴老門

生執饋縫衣憐雪立恩醲賢宰相酸扃經被報春暉時紀
文達師亦文恪門生輓聯亦以老門生與賢宰相作對歸
語其孫薊林曰惟我兩人所見畧同也

董文恪公之夫人沒於京師時文恭公已登揆席文達師
作輓聯云富春江萬古青山阡表長留慈訓能成賢宰相
聽雨堂九年絳帳食單親檢舊恩最感老門生桃符綴語
載此聯以爲陶太史撰蓋誤

紀文達師因誦某詩云浮沈宦海如鷗鳥生死書叢似蠹
魚戲謂此二句可作我他年輓聯劉文清公云此惟陸耳

山副憲足以當之未幾而陸訃至蓋方被

命赴濟陽覆校四庫書以天氣驟寒裘衣未到凍僵於
旅寓中也時以爲語讖

紀文達師輓彭文勤公聯云包羅海嶽之才久矣韓文能
立制繪畫乾坤之手惜哉堯典未終篇蓋文勤方專司

高廟實錄藁本未能竣事而薨也

沈歸愚尙書

德潛

輓桑浚甫

詞元

云文星酒星書星在天

不減金管銀管班管其人可傳

畢秋帆自營生壙於鄧尉山並自作輓聯云讀書經世卽

真儒邊問他一席名山千秋竹簡學佛成仙皆幻相終輸我五湖明月萬樹梅花

昌平陳紫淵宮詹

浩

與錢唐陳句山太僕

兆倫

並負重名

時有南北二陳之目宮詹有晚吳湛山中丞

聯

云使

節轉聞疆舊雨追思鄂渚蘭言如昨夢耆英推洛社生芻

遙莫謝庭玉樹總層霄中丞爲香亭侍郎之父曾撫吾閩

與宮詹爲摯好此聯湊婉動人寫作雙美侍郎爲裁截成

卷徧徵同人題識新建曹文恪公仁和胡文恪公富陽董

文恭公及吳白華褚筠心

廷璋

陸費丹叔

堪

謝蘊山

啓昆

諸公皆有跋以一聯而集成巨觀蔚爲墨寶宜中丞之孫
紅生舍人葆晉珍秘若球璧矣

梁山舟學士所撰輓聯極多茲擇其尤著者錄之輓梁文

定公

國治

云天北掩台垣聞說槐音中夜斷江東失宗袞

心傷荆樹一時摧時其弟冲泉亦沒也輓其始夫張藻川
侍郎云朝無諫草家有賜書廿載清聲光簡冊公應騎箕
我悲陟岵一時血淚灑葭葦輓藍素亭河督云帝畀以河
三策勤勞著淮北臣心似水四知風節婉關西輓錢竹汀
宮詹云名在千秋服鄭說經劉杜史神歸一夕仙人骨相

宰官身

錢籀石先生

載以

上書房侍郎致仕山舟學士輓以聯

云青宮授几洛社圖形官府神仙皆慧業達尊備三絕藝擅四儒林文苑並傳人自注云昔人以文與可騷書詩畫爲四絕也

山舟學士之妹夫湯畫人辛未庶常未及散館而沒年僅四十生母猶在堂學士輓以聯云四十年生有自來身到蓬瀛天遠召三千里沒而猶視心傷桑梓母何依又輓其師莊對樵云孝思盡宦海家園榮親養親一笑生天證佛

果道望齊太山梁木吾仰吾放幾人入座哭春風又輓陶
篁村云萬里兒啼此日愁攀賢令轍卅年老淚隔江空盼
少微星時篁村之子方宦黔中也輓其兄春淙云一品承
恩魂魄長依華屋九重念舊馨香宜徹幽泉輓明中和尙
云畫裏傳衣夙契偶同承長老山中獻蓋前塵誰證衲禪
師自注云余畫過去僧像師爲補衲又師與先人同入詩
社輓佛裔和尚云竹葉蕉枯此日是師真面目焚香灑水
當年惟我舊朋儔自注次句指恒公寂時事

山舟學士輓孔谷園

繼凍

聯云臨去詩成寫照靜仙明月

清風人已遠平生墨妙辦香冰叟虹樓瀛海世爭傳自注
谷園沒之前數日有題蘇尺牘詩明月清風卽詩中語天
瓶居士張文敏公爲谷園婦翁玉虹樓谷園齋名瀛海仙
班帖天瓶書也

邱南屏侍郎

樹棠

以事降調未補官而卒時辛卯上元日

也是日值月食彭春農以聯輓之云大雲暫作閒雲風規
自在元夜頓成長夜月魄同虧

陳荔峰侍郎爲內閣學士閱二十年始擢少宗伯旋攝少
宰少農駸駸乎大用矣以病乞假調理已就痊愈是日讌

客至中夜眾賓甫退始就寢不逾時起坐咯血數口而沒
彭春農輓聯云撒手了無難夜宴方闌歸碧落傷心將大
用夕陽雖好近黃昏

平湖吳臺卿

顯德

松圓協揆之猶子山舟學士之甥也幼

聰敏年十六受知於朱文正師補博士弟子員才藻冠時
調取青紫如拾芥矣乃十上鄉闈未離席帽鬱鬱不得志
遂遁而學仙日從事乩鸞叩長生之術年未四十以療卒
太夫人猶在堂也學士輓聯云天道何知不許阿嬭留李
賀神仙安在翻教老淚哭羊曇讀之令人酸鼻

山舟學士與其德配汪恭人俱登大年恭人長學士一歲
先學士二年卒學士輓聯云一百年彈指光陰天胡靳此
九十載齊眉夫婦我獨何堪逾二年學士始卒年九十三
沒前數日手書訃稿遺命不治喪不刻行狀同里眾紳士
輓聯云朵殿奉絲綸四百紙述事記言史館猶傳大手筆
明湖思俎豆九十載清風儉德邦人長想古衣冠

鮑覺生先生

桂星

才氣冠時徒以傲兀凌人爲世所嫉臨

終自撰輓聯云功名事業文章他生未卜嬉笑悲歌怒罵
到此皆休遺命懸於靈几之前則仍是本色語也

浙中蘇子齋

釋

由翰林改官侍御以公過鑄級捐復刑部

副郎轉正郎出守山西朔平以憂歸起復守山東青州卒
於官有素交官於廣東者聞其訃痛之寄聯輓之云譽美
西清望重西臺又威肅西曹出治懋勲兩省春風思大
守耗傳東浙心傷東魯奈身羈東粵招魂長歎息一江秋
水哭先生

徐秋崖孝廉

廷熲

於會試場中得病十四日而沒於邸舍

時令嗣訪齋亦以會試隨侍京寓封翁來若先生年八十
猶在堂也梁小槎比部輓以聯云十四日病莫能興幸齋

梓相依屬續尙能親舍五三千里沒而猶視痛桑榆垂暮
倚閭猶自盼泥金

道光乙酉德清徐倪氏之案自巡撫以至典史一城之官

盡呈吏議王小華廉訪

惟詢

以急欲平反此案遂至自裁

蔡生甫學士

之定

輓以聯云剛毅木訥近仁生原無忝聰

明正直而一沒則爲神頗肖其爲人然以三品大員爲此
無名之死論者惜之

許周生駕部

宗彥

病中語人云夜來曾作詩記得二句頗

切近狀句云厭聞家事常如客愛看名山梅不僧今緇鑑

止水齋集無此二句蓋偶得句而未成篇也駕部沒前三日自撰輓聯云月白風清其有意斗量車載已無名可謂了然於去來者矣

秋坪新語載紀文達公長子汝信申乾隆乙酉孝廉卒時公甚爲之神傷語客曰今乃知因果之說或亦有之蓋孝廉病絕而蘇者屢矣忽一日聞其聲宛山西人也問故曰某來索逋茲已償清仍欠若干可亟焚楮鏹如數當去家人輩如言焚之遂瞑方環哭問又蘇張曰曰所乘馬後足顛蹶弗良於行可易一匹則乘之去矣眾茫然公之三女

哭告曰誠有之見氣絕時所焚馬吾見其後足紙捐或卽其故歟因別製一具焚之乃不復蘇公於靈帷書一輓聯云生來富貴人家却怪怪奇奇祇落得終身貧賤願有聰明根器願生生世世莫造此各種因緣蓋孝廉素性揮霍錢刀到手輒盡又緣事被磔公以其過不檢攝禁弗使出日給資用無少溢孝廉深苦其拘磔所有付之質庫卒之曰蓋不餘一物云

紀文達師與龔匏伯先生

視身

同校

四庫書最相契後

先生以軍機章京觀察滇南終於位師寄輓聯云地接西

清最難忘樞密院有公餘茶話恩深南徼惜空留昆明池
畔去後棠陰

彭文勤公輓鍾碧溪大令聯云匪特蕙蘿親著同筆研相
將老空懷松菊志家少田園竟不歸

粵東張儀坡庶常特才放蕩未及三十卽以酒色殞其
生其師花廳亭方伯甚慟之輓以聯云與人何尤可憐
白髮雙親養子聰明成不幸自古有死太息青雲一瞬如
君搖落更堪悲

余撫桂林延日月滄郡丞主秀峰書院講席士論翕服余

常就諮地方利弊兼以政暇談藝皆獲益良多惜其驟歸
道山繼主講者爲黃春亭也侯時亦佳士有輓呂聯云德
舍荀君久以範模乎梓里文追白傅豈惟政事在杭州爲
時所稱余旣爲撰墓志亦輓以聯云三管失斯人癸水辰
山都閭淡千秋存定論鄉賢名宦竹馨香蓋月滄品學俱
優曾官兩浙有循聲尤長治獄也時合省之士大夫以請
祀鄉賢祠環顧余已爲擬定疏稿適同官有違言遂閣不
行亦可歎矣

盧厚山宮師嘗總督兩廣兩湖巡撫江南山西觀察廣東

山東湖南又於丁憂伏處時奉

特旨起家管西域軍需局駐劄肅州凱撤後遂巡撫陝西
其沒也由宮保晉官師加輕車都尉世職謚敏肅余甲寅
同年中勲名之盛未有如公者也裕魯山廉訪裕謙寄聯
輓之云曠典邁千秋帶礪台衡天錫殊綸榮衛霍仁恩周
十省鞞鈴黼黻人從華屋仰臬夔

劉星槎司馬

台斗

寶應名進士也山水部道守烏鎮以督

運終於官舒白香吳以聯云學究天人祇曾博文章一第
不堪公輔僅試官永倅三年

同年李服齋廉訪

文耕

雲南人由山左縣令起家清節循

聲上達

宸聰不數年遂秉臬齊魯移官黔中以老病引退終於家
余壬戌同榜中不乏俊異之才而言坊行表必推公爲巨
擘詢之滇人士亦無間言王孚遠方伯晚以聯云道學風
高望推南詔循良績著念切東人方伯山左人故抒其去
思如此

四川李墨莊太史

鼎元

客死揚州貧無以斂吳山尊輓以

聯云百金囊盡揚州死萬里魂歸蜀道難

鄭雲軒孝廉

天衡

與余同肄業鰲峰書院復同舉甲寅

恩榜實余之妻叔外舅鄭蘇年師之弟也甫踰四十而沒時節母廖太孺人尙在堂師哭以聯云緣盡先離傷心冊載荆枝漫說來生還有約事竣未了回首七旬萱蔭敢言已死便無知一字一淚情深於文矣

徐兩松中丞

剛曾

撫閩有惠政其培植鰲峰書院士子尤

緊去思聞其易簀前數日自撰輓聯云仗我佛慈悲指示方悟得無我無人做吾儒切實工夫已結到而今而後可謂了然於去來者矣

薩檀河邑侯

王衡

雄於文尤工詩皆不屑拾人牙慧嘗爲

一縣令之母輓聯云民是賈兒甘棠歌衆母母官真佛子
妙蓮現法身身可云別致余嘗借以應一達官之求遽遭
齒冷而置之

紀文達師於乾隆癸未甲申間督閩學時余家自先大父
及先嚴暨諸伯父叔父皆及門受業師訪知余家自前明
以來十五代秀才相繼不斷特書書香世業一扁爲贈先
資政公因製堂聯云近承十五葉囊箱闡發金書玉字遙
印千乘侯矩矱優游聖域賢關千乘侯爲聖門七十二賢

叔魚公鮪封號實吾家遠祖也余於嘉慶壬戌成進士適
又出文達師之門一門三代皆爲門生皆登詞館師每對
人舉爲美談是秋聞先資政公之訃設位於京邸師親來
拜奠並手製輓聯云十五傳蘭玉相承授硯三看入芸館
六千里泥金甫報撫楹一笑返蓉城

道光乙未入都以所撰樞垣紀畧質之長懋亭公相齡公
聞之甚喜爲辨析疑滯數事且爲述乾隆年間樞直舊聞
娓娓不倦蓋是時軍機老輩無有在公之前者丙申再入
都見公益矍鑠堅坐久談有後生所不逮者因叩公調攝

之方公笑曰十年前有星士相我將來名位可及阿文成
惟年壽少邇耳文成年八十一今我也七十九雖嬰鑠又
可恃乎余以他語解之而公果於次年元旦告終聞除夕
向家人查詢歛縣曹文正公終於何日眾對曰正月二日
公曰我不可居其後逾日遂逝故徐星伯松輓聯云易簣
預知時一日期先曹太傅蓋棺先定論千秋名並阿文成
時余在桂林接公訃書亦寄聯輓之云出將入相垂五十
年功比汾陽壽同潞國掃穴犁庭越三萬里昔追定遠今
輓章佳亦紀實也

彭春農曰曹文正公自勝衣卽受業於先文勤公故與賓從談時輒舉文勤公詩文言行以示後進諸君皆以爲聞所未聞公之沒也

賜諡之旨專舉睢州湯公大興朱公作配予輓公聯句云帝眷老成人直追濬昭代前賢當之克配師承先大父從此問昔年遺事知者其誰上聯 舉國恩之火下聯述私交之密也

彭文勤公有女許字同里曹文恪公之子曹氏子殤時女年甫十齡卽矢志守貞生平究心經傳不似閭秀之僅以

詩文表著者文勤公病篤會刲股以進故奉

仁廟特旨旌獎誠異數也未幾遂沒劉金門先生輓聯云
名父名翁名女士大貞大孝大完人

余秋室學士悼亡聯云濟艱辛嘗險阻貧家婦信難爲
痛今朝鏡破釵分欲圓夢影重圓除異世再同青玉案習
荆布厭綺羅半生儉應可法奈塵海颺馳電掣贏得裙痕
如舊到秋宵怕檢縷金箱哀怨纏綿不愧才人之筆

黃蕉卿

巽

錢唐梁紹壬之室隨梁入粵間關度嶺未及半

年而沒梁輓以聯云四千里累爾遠來父在家母在殯翁

姑在堂屬續定知難瞑目廿三年棄余永訣拜無兒哭無女繼承無姪蓋棺未免太傷心蕉卿有聽月樓詩不減慧業文人宜紹王之有餘痛也

靖安天香居士舒

夢蘭

字白香負才名其配李湘絃亦婉

慧有才于佳人之曰李以中秋夜化去白香悼傷甚至所作秋心集中有輓辭錄一篇稱堂中輓聯以葬西原太守爲最句云仙去何之燒鼎白雲棲斷壑神傷已甚著書黃葉冷空山真才子筆也又載陳果堂聯云千佛禮鳩摩居士案頭庵昧旦五更驚蛻羽天香館畔咽秋風胡果泉中

丞聯云蟾蜍掩清輝歎當年玉宇瓊樓難覓靈丸延壽藥
鹿車隨大隱知此後故奩遺掛重哦寒夜悼亡詩劉星槎
司馬聯云家有詩仙惜到處名山未能偕隱身常禮佛覺
往生淨域確有明徵吳蘭雪中翰聯云奔月訪姮娥忍令
天香虛舊館持花歸淨土徒煩松雪禮中峰汪巽泉學士
聯云仙娥明月是前身想歸真翠水丹林桂蕊靈香同郁
烈名士秋風添別恨漫寄意繩床經案蟲絲落葉共淒清
皆名筆也

韓芸舫中丞

克均

巡撫吾閩其夫人以四月八日卒於官

解僚屬公輓多頌揚語先生俱不愜意惟孫平叔督部一聯云解脫拈花剛佛曰證明因果在仙霞韓見而歎曰畢竟名士吐屬與眾不同

余由蘇藩引疾假歸後一年卽遭亡室鄭夫人之痛百事俱廢不但悼亡詩不能成一字並輓聯亦無之惟手書影徂心在四字於靈帷而已憶程春海侍郎寄聯云淑德稱女師孝著鄭經禮修梁案令名相夫子澤流三紫絮被萬家語特矜重足令泉壤生輝又林少穆撫部寄聯云相夫垂四十載辛勤出處同心晝錦歸來猶並轡濟世具萬千

緝功德熾昌啓後夜臺化去合生天則隱括余行狀語也

又門人祝秋臺侍讀

春熙

長聯云千里尊羹方偕歸隱三

閭茆屋幸免賃春卅八載鴻案相莊痛半世釵荆彤史遽
亡賢德曜鑑鑒才思茂末心欽書帶家聲蘭猷耳熟廿六
年鯉庭陪侍對後堂絲竹絳帷望斷老彭宣亦紀寶之詞
尙非輓聯俗套

陶雲汀宮保由徽撫蘇撫晉督兩江前後將二十年以勞
瘁終於金陵

賜諡文毅入祀賢良祠余壬戌同年中黜名之盛未有如

公者也卓海帆尙書

秉恬

哭以聯云天下大事公可屬江

南遺愛民不忘京中同人皆以爲切當余亦寄聯輓之云
尹文端厚澤深仁重見江鄉說遺愛陳恪勤精心果力方
知楚產信多才蓋宮保狀貌雄偉方口豐稊酷似其鄉陳
恪勤公余蒞吳日因修陳公祠拜像而知之曾紀以詩云
省識羹肴如有悟始知從古楚才優宮保聞之亦頗自喜
此聯猶前詩意也

朱詠齋太宰

士彥

亦余壬戌同年一生以樸誠爲

上所倚任其直

上書房時尤以嚴氣正性自持斷斷辨

論之聲達於中外

上在乾清宮時每遙識之比年奉

命獄獄周歷各省不敢告勞甫還 朝未久卽卒

賜諡文定加宮保銜可謂備極哀榮矣余寄聯輓之云師
範重三天謦欬聲猶留殿陛皇華周四國樸誠望早式班
聯無溢美也

陳芝楫中丞

鑒

由鼎甲翰林出爲江南郡守初權江甯府

補授松江府旋調蘇州府取白香山詩句鐫一小印曰自
出承明三領郡余藩吳時芝楫適守蘇州文采風華傾其

流輩以於余有推薦之誼執弟子禮甚恭踰年卽擢監司都轉陳臬開藩遂被開府豫章之

命旋移吳中權江督兼河督近科詞臣名場之快利未有如公者也聞其擢浙臬時初

觀京師引對甚稱

旨有此後前程不可限量之

褒乃

獨用方殷而修文遽召年實限之謂之何哉余以聯寄輓之云儀表稱科名

帝許雲程難限量文章兼政事我慚風義託淵源

哀輓通用之聯亦有佳者如悼亡云春江桃葉鶯啼溼夜

雨梅花蝶夢寒 寶瑟無聲絃柱絕瑤臺有月鏡奩空

總帷忍痛安仁句惟警難忘德曜風 戚友云氣數不言

仁者壽性情猶見古之愚 諫文作自先生婦遺稿歸於

後死朋 蘭亭少長悲陳迹玉局風光歎化身 素車有

客奔元伯絕調無人繼廣陵 雲深竹徑樽猶在雪壓芝

田夢不回 文章卓犖生無敵風骨精靈沒有神

白傳句

事業已歸前輩錄典型留與後人看

坡公句

稱觴尚憶登

堂事挂劍難爲過墓情 十載名場成勁敵九重泉路盡
交期 達官云峴山碑墮羊公淚浚縣圖留陸子型處
士云桃花流水杳然去明月清風何處游 上界由來足
官府西風何處哭文章 墨雲香冷來禽館薤露寒生賦
鵬文 不作風波於世上別有天地非人間 又八字云
未碑前思頭作永別追尋笑緒皆爲悲端 一代傳人鄭
虔三絕十年循吏楊震四知 又十二字云象應少微星
彩落蕭辰悲夜月名傳蒼葛傳芳流梓里憶春風 小別
遽招魂始信憂勞能損壽高堂久忘世那堪遲暮轉摧心

叔輓姪云別室具銅盤期爾從容光素業中庭摧玉樹
愁余遲暮哭窮途 兄輓弟云同氣遽分途原隰秋風魂
不返異時誰共被池塘春草夢難通 兄輓妹云勁節勵
冰霜定卜瀧岡終有表衰年鮮兄弟可堪雷听更無書
甥輓舅云有淚灑州門千古白晳增太息無才成宅相甘
年青眼益酸辛 婿輓翁云浮白自慚蘇子美垂青空憶
李文公 弟輓師云問字感當年重謁元亭空灑淚傳經
珍此地載瞻絳帳暗摧心

曹薺原宮保

文壇

於乾隆末乞養里居歿於嘉慶三年彭

楹聯叢話

卷十

九

文勤師輓聯云人爵貴天爵更尊解組學鳥巢反哺
帝星升臣星先隕騎箕爲龍馭前驅

富陽董文恭公身爲太平宰相三十年曾兩次畫像紫光
閣勲名之盛一時罕有倫比而身後清況乃似寒門潘芸
閣學士錫恩有輓聯云珠玉自天題計兩番紫閣圖形早
有丹青傳相業樓臺無地起綜卅載黃扉翊化惟將清白
表臣心